

netarum circa eundem Solem, intelligi inde volui, prorsus non dari quia *natura uno & eodem modo agit*. Syllogismus esse potest talis: Natura semper adeoque etiam in motu magnetico, quo Sol Planetas & terram circa se ducit, eodem modo agit, Natura alicubi non eodem modo agit, nimirum in motu terræ, circa Solem, qui diversus sit à motu quinq; Planetarum, circa eundem Solem. E. Quoddam quod ubique eodem modo agit, eodem ipso in loco non eodem modo agit. Conclusio est absurda, quippe quæ sibi ipsi contradicat. E. absurda est vel major vel minor, non major quæ est axioma Physicum, E. minor, quæ sequitur, posito motu terræ Copernicano.

§. 3. Ostendat jam Watsonius, ubi lateat favor ille meus sententiæ Copernicanæ, aut fateatur, sese studio non docendi, sed sine fundamento contradicendi & Studiosos perturbandi, Physicam meam Aristotelicam præ omnibus aliis libris [quos tanto numero citat, ut non tam librum, quàm librorum catalogum scribere voluisse videri possit] & quidem tot in locis, & interdum tam odiosè impugnandam sibi sumsisse.

Quæstio VI.

An motus Planetarum, quo circa Solem ducuntur, Magnetici sit?

§. 1. Verba Watsonii ita habent: *Fictitius est magneticus motus Planetarum, quid magnes inter sidera?* Resp. 1. cum motum magneticum dixerim, Keplerum secutus, non tam magneticum quàm magnetico similem me voluisse intelligi. Repetere ergò prius secum debebat Canonem Dialecticum, *simile non esse idem*, antequam tanti viri [Kepleri] tam gravibus ex causis inventa, quibus meliora nondum attulit, figmentis, h. e. mendaciis, annumeret. 2. Quòd in Physica mea Aristotelica ad finem Theorematis XX. adjeci hîc repetocellurum me cum hâc sententia ei, [sive Watsonio sive cuivis alii] qui meliorem sive evidentiorum rationem motuum cœlestium reddiderit; nominatim quoad hanc apparentiam, quòd Planetæ simul & semel moveantur, ab ortu ad occasum, ad regulam æquatoris & circa Solem & ab occasu in ortum, neutrum tamen exactè, sed cum quadam deviatione [in se tamen itidem regulari] nunc ad Meridiem, nunc ad Septentrionem, ad normam orbitæ propriæ, &c.